

四庫全書

集部

欽定四庫全書

集部

粵西文載卷

二十一

詳校官庶吉士臣瑚圖禮

主事銜臣徐以坤覆勘

總校官庶吉士臣朱 鈔

校對官中書臣王 瓚

謄錄貢生臣王 宮

欽定四庫全書

粵西文載卷二十

桂林府通判汪森編

記山川

容縣龍墳山記

明彭清

龍墳山距城南二百里許路由古鄧經維霸白花村沿溪澗中肩輿以進抵徭人居有崢嶸爲壑飛瀑如碓下白其左峰巒峭峙當半儼然一月堂龍之墳歸然中處

墳之前偏左有石池一容水數斗山石如削下臨急湍不可步履隔湍水而觀曾無三十步湍之上則羣流奔瀉潺湲竟日近五六步漸流無聲聚成一潭淵深莫測蓋靈物潛蟄於此其源乃天塘九支之一潭之右有石如碁高可二尋與龍墳對其視墳則俯瞰矣永樂十九年歲在重光赤奮若自春入夏不雨官民徬徨詢諸父老皆莫知其究時容禦龔千戶政其叔慧人也多聞博記得龍墳事實於屯夫樵豎之口具以告予十日齋牲

醴率僧道永禪等行一日又半至則木石之交塞者拔
之僧道咒其水有魚類鰕鱉蜿蜒遊於水面浮漚相接
而上四顧則飄風颯颯林有暗色衲子羽流恐歸失路
余出已俸若干付山老唐萬四傭衆取堅木立祠於石
碁之上先勅行寮爲式署其碑曰龍墳潭龍母夫人之
位囑鄉農歲祀之是夕城鄉皆雨自酉及亥地多黃潦
歲之所獲比鄰邑加三之二焉其應驗如此越明年壬
寅首夏祠成里之老人梁保以舊志白余余撰文一首

具禮以祀邑人薛以文請書其事於志尾庶後有以撫其實爲來者告因錄之

堯山謁堯廟記

李棠

桂城之東有堯山山之麓有堯廟莫究其所始然唐衡嶽道士軒轅彌明有堯廟詩宋廣漢張宣公有謁廟辭則廟之來久矣景泰甲戌夏四月望余約制使諸公泊三司長佐謁廟且以省民之耕是日梅雨初霽風日清朗出就日門登舟過灘江由小徑道田間可十餘里

至山下父老數人前道山有兩岡若修肱環抱廟當其中林木奇古翛然物外一石澗自左而右潺潺不絕跨澗一石橋接輦道去廟十許步衆下車橋之南肅趨而入焚香展拜廟中巍然帝像左右像二神與帝並余與諸公命撤而正之父老蹙然曰二神事之久撤之恐厲吾民余曰帝位天子其德化之盛與天地流通二神設無知事之何益有知彼且以踰越自咎尚禍福汝邪父老皆釋然寢殿像帝后亦雜以訛怪衆形并撤之廟前

三碑一刻宣公修廟洎請祀典始末一刻經略張維廟
辭一爲元廉訪經歷郭思誠復田記已事復過橋登車
緣澗而出澗之濱一老人葛巾藜杖貌甚古其髮如雪
問其年曰五百二十甲子矣道前時事甚悉山之前民
居鱗比彌望皆秧畦麥壟耕者牧者荷而樵者擔而饁
者林林然道之左右老少若環堵皆津津有喜色熙然
陶唐氏之世問之曰比歲風雨以時無疠疾無盜賊故
吾民得盡力農畝而安且樂如此余與諸公喜甚因少

憇道傍之寺大監總戎設醪饌觴酌屢行劇談傾倒一
奚童歌數闋以侑豎十數嬉狎於前殆若相忘衆以糗
餌分食之皆抵掌欣喜不忍去旣而夕陽逼西山遂復
灘江登舟還中流相謂曰吾徒之憂樂一考之民今日
之樂由民之樂民之樂由歲之和與吾君之賜也不可
以忘時同謁而遊者鎮守太監班祐總督兩廣軍務副
都御史馬昂副總兵征蠻將軍都督陳旺巡按監察御
史夏埏右布政使梁蔡右參政婁良按察使計澄副使

甘澤記其事者巡撫兼督軍務刑部右侍郎李棠云

重修靈渠記

孔鏞

成化丁未歲夏廣西桂林府興安縣重修靈渠成知府
羅珣守備興安行都指揮事楊觀全州知州單渭請記
於予予按舊志靈渠自海陽山出下流直注湘源行西
北至興安縣東南五里所薄嶺址磯逆爲塘渠引其水
爲二北會於湘南會於灘湘達洞庭江漢灘通兩廣南
海史祿肇鑿於秦馬援繼疏於漢作鉾隄創陡門踵前

武增舊蹟唐之李渤魚孟威宋之邊詡李師中相繼修葺事具載孟威師中記厥後五嶺朱晞顏提刑胡長卿以次加葺至國朝千有餘年歲久渠壞洪武二十八年秋奉議南丹向武諸州土人謀叛朝廷命將征之時致政太子少保兵部尚書唐公鐸來議軍事道經興安覩渠廢弛聞上勅監察御史嚴震直來董厥事嚴公恪遵上命躬督修築不兩踰月而告成上嘉其功歷官至工部尚書成化乙巳洪水薦至渠隄大壞官民病焉郡吏

考諸故府比舊以請藩臬議宜修建以復舊規時欽差
總鎮兩廣司禮監太監劉公倜鎮守廣西御馬監太監
劉公昶總督軍務兼理巡撫都察院右都御史宋公旻
總兵官安遠侯柳公景副總兵都督王公受巡按監察
御史程公春震余公饑咸曰是渠當南服往來喉舌之
地田疇之灌溉舟楫之通塞繫焉今已湮廢公私患之
烏可已哉遂允其議發公帑市材採石宋公復下令曰
財不可妄費民不可數勞必究其所以長久者工曰隄

不以石則無以禦橫流木不以堅則無以支永久往昔
雖屢葺屢壞皆踵舊迹弗克遠圖所以徒取其易成而
不計其易壞也於是更相告飭務圖經久命知州單渭
相度湮圯示要害庀材物集工力乃先紆溝漢畎故迹
以通乎塘橫岸鉞觜北壤以抵乎溝溝會北渠通穴之
處以暫泄水於中岸塞中江併走之流以便施工於下
次用巨石以甃鉞觜措魚鱗繕渠岸構陡門然後闢橫
岸以復北渠之口塞紆溝以絕漢畎之流三十六陡延

袤五十里凡有缺壞葺理無遺爰得兩渠舟舸交通田疇均漑復舊爲新較之舊規相去萬萬始於成化二十一年冬畢於成化二十三年秋夫靈渠之役有人民土地之常事今諸公同心協謀視民事之急乃力爲之況役之以時而民不告勞用之有度而財不妄費無一不合於理者揆之春秋之法常事不可書也此何以書之哉噫善爲政者當爲其所不可不爲而不擅爲其所不得爲輕其所不必爲則渠作於一日斯持久於方來不

以速成爲能而以他日易壞爲慮蓋仁者之事而斯民之所共賴也書之者豈記其功之敏哉謹具以告來者俾有所考以圖其無斁耳若夫綜理其事者則有左布政使今陞右副都御史廣東何經鄱陽劉城右布政桂陽周瑛右參政今陞江西按察使上海王濬前戶部侍郎今任右參政東魯秦紘左參政浮梁戴琥右參政豐城傅實副使姑蘇林符內江吳玉參議南海唐盛陽城潘洪僉事泰和蕭蒼香山黃鑰瓊臺李珊巴渝陳嘉謨

與鑄垂成時又得尚書嚴公震直外孫吳興閔珪以都察院右僉都御史改廣西按察使相與嚴公後先督修是渠之成則是渠之遭遇也豈偶然哉是爲記

前洪武間重修

陳璉有記不錄

仙巖記

桑悅

離玉融城而南三四里有洞洞前有小江並造三石橋俗云人神鬼行之可笑洞門高三十餘丈猿猴不能上昔道士杜應然置鐵環崑頂燃燈光照三十里今環尚

存進洞高明軒豁石崖蒼然與雲氣相接從旁穿窈窕而入有小洞曰應化頗淺狹外爲壇三層置三清諸真像稍曲折而進有結乳長二丈餘遠望儼如老子宴坐其間鬚眉皓然凝然不動有新浴非人意諸石獻奇旌幢擁列獅子居前烏猿居左青牛臥於溪旁直前丹竈半破履迹如新水從安靈潭界崑而下漱石作潺潺聲似誦五千言者相傳老子曾投丹其中飲者恒得高年故云壽溪用火炬直入寬廣如堂殿復從一石奧穿出

縫隙下視洞見溪流曰水月洞天履小石隄過溪而南
崖邊有白石佇立如鶴又有一四平小石門嵌石壁中
名兵書峽門已缺一角少西攀嶢嶢而上一穴通天恒
置竹梯其中上爲羊角塞羣夸不靖居民則從梯而下
避兵嵒中其芝田丹井連絡布列循溪西行復從南斜
入沙磧積乳成屋戶牖玲瓏化工結構奇巧入神又下
溪潄而望嵒之盡處明露一竅乃一小舟從竅而出俱
巨石蔽虧其前涉流而北面西復得一洞垂乳如纓細

流一灣從洞前過至此如入老君之室卽李惟德所謂
千萬年人迹罕至者初洞以老君名又名靈嵒宋祥符
中改今名張孝祥曾評是巖爲天下第一仁宗賜御書
百軸石像後建閣寶藏屢經兵火琅函與閣俱付烏有
數百年故物惟洞門左三角卷石上嘉定間守融州鮑
粹然建亭其上如魯靈光之獨存屢歌斜復正疑有神
護舊挿木版於嵒爲橋以渡今版將腐人無敢過名亭
從嵒名長沙易被爲之賦碑藏嵒中如新刻洞凡數處

惟應化有扁其他或名天葩或名乳花或名和光或名
寒烟或名玉葩或名寶構或名碧堂或名清奧竒石異
狀除前確然定名外其他或名仙梯或名仙衣或名玲
瓏或名金星或名蛇倉或名蓮花或名北山轉斗或名
呂仙隱形或名鍾離觀泉或名尹喜現相各洞分支如
仙室仙徑飛星壇釣臺基臺雲臺放生池羅漢壁又不
可悉數易曰仁者見之謂之仁知者見之謂之智此之
謂與崑中碑刻甚多非數日不能盡觀略可記者元祐

黨籍碑韓魏公像及魏公所書老杜義鵲行端楷森嚴
可敬可愛蘇黃字則散漫其中崑前後俱村有警恃此
洞爲長城不知沒後一洞以舟而入者尤爲險固水涸
時亦可活數十命垂白之老莫知其處

開邃巖記

弘治甲寅正月予築城於玉融揮使苗侯廷珍邀予同
按行郭外羣夸部落以宣朝廷威德出城而西馬步雜
沓旗旄鮮明笳鼓聲競犺犗頭目來謁者絡繹悉慰勞

而遣之及歸侯曰聞此地有彈子崑其勝不減老人者
予盍隨文旆一遊可乎侯遂與予並馬從馬腸峒口而
進盲行將二里忽見一山橫亘儼如臆對侯乃駐馬仍
陳師守隘以戒不虞鐵銃一聲雷霆震驚連山答響移
時乃止衆扶予下馬相翼履峭崿而上數十步進口稍
狹內甚高明寬敞穿穴始用火炬直入愈深莫知所極
玲瓏透漏戶牖相通左竅別有石室規制如殿上擁華
蓋蓋上爲閣壯麗莫比是處石乳融結玉柱柱頂多繚

以慶雲如天樞如承露金莖狀其他如塔如爐如餅如
卓如幡幢如屏障如獐鬼威神如天祿辟邪者凌亂塵
目不可正視造化結構之精天孫投其機杼公輸弛其
繩墨荆關董米喪其丹青亦信奇矣哉予見通都大邑
多乏山林之勝好事游賞者肩摩踵接頑石荒阜得以
被綺羅而聽絲竹有品如此而乃置之窮荒之域虎狼
之與居猺獞之與鄰蒿萊荆棘爲之充塞蒙蔽夫乃宰
造物者亦疾其盡奪乾坤之秀而投之非其地邪觀化

工可以推世故鑒物象可以驗人事非偶然也嵒產圓
石子故以彈子名在宋元豐間權融州軍事錢師孟易
名曰德子愜茲嵒甘埋幽僻深藏不市且其量之弘足
以容民而畜衆又改今名嵒之久閱理宜大顯嗚呼天
之所以處嵒與嵒之所以自處是必有待者矣朱子云
千載而下不患知我者之無人此之謂與開是嵒後士
女遠近遊觀者日以千計盃盤相接茅塞成蹊不知爲
邊州落寞之地凡物通塞有數理或然也

遊古鉢山記

王濟

州治北數里有山名古鉢以形如覆鉢故名上有一女郎神廟余職歲祀事嘗一至焉其山視諸山頗秀拔當入嶺處有深澗淙淙不絕石梁跨之徑路縈紆松栢樟榕諸木蓊鬱可愛路半有屋三楹名半山亭殷指揮貫重建余爲記於石自半山轉百餘磴有一坡極平坦復上數十磴有大榕木夾道離立過此即絕頂神廟在焉四顧遠近諸山若拱揖不暇者南望州治大江寶華諸

山皆在指顧山後林木一望無際誠一州之勝也考宋元諸碑神乃有唐姓陳一婦人嘗縱鯉一日道遇白衣人告云可速携家避古鉢山上此地明將爲巨浸矣還告其夫倉皇挈家方至山半其地已陷今存龍池塘數十頃即是後其婦遂神此山前所謂白衣人蓋所縱之鯉報活已恩也唐宋及我皇明皆有夫人之封著在祀典橫人至今不食鯉云

遊湓塘巖記

與客坐間談橫州山水佳勝必首及湓塘嵒次則謝村
嵒焉彼人呼洞曰嵒余終以公事羈縻不能一往後乘
進表之行軍衛鄉宦舉人諸公置酒舟中餞別乘興一
登始畢素願先至謝村方維舟村老一人率百夫列炬
前導行半里皆平坡後入小路逶迤縈繞數曲即有巨
怪石數十餘依石轉二三曲得一絕壁若無可入處復
巡一石後方有一洞門頗寬敞入數步一小方池水甚
清徹云歲旱不涸沿池轉摺數十步秉炬而行復轉一

曲卽有小水聲常汨汨深淺莫測洞約深數里水亦如之白石如玉奇怪不可言有石如老君危坐臺上人亦呼爲老君石亦有若獅象人虎千態萬狀或如冰柱下垂亦有自地涌出上挿者行半復有一岐石亦深廣至盡處極高曠頂有一穴光射洞中明朗可愛人云其小水中產嘉魚至九十月自穴出大江人從穴口捕得甚肥美人極珍貴地里誌載云蜀夔府達縣雅州與漢中沔縣俱有丙穴產此魚獨不云橫其穴亦宜以丙穴呼

可也游畢還舟渡江行里許見一山巋然於平曠中即
湓塘嵒也陸行皆叢楚榛莽中有小蹊乃前村老輩率
人新難入者約數百步有巨石磊塊塞洞口巡石環走
得入洞處中甚寬廣明朗四圍及頂皆有穴透入日光
中多奇石色青翠若所繪金碧傍升一石有若磴數級
即一小路巡石壁而行縈繞數曲一石隙可上地亦平
曠其西有窓數處可以下窺先所入處復於其上有一
石如舌下垂人呼爲龍舌石遂索一梯自龍舌攀而上

得一門入復平曠如前以入洞時計此第三層也余遂
索筆大書重樓洞天四字於上傍亦有一門出得平地
一區若露臺下視甚高峻四望亦曠遠長江若一練帶
圍遼遠近諸山如列屏障此又可受諸公於洞中盡醉
出至江潯而別

完山記

顧璘

完山者州城東北隅山也巍然負郭三江匯流其下爲
州之鎮視今蔣氏大中丞梅軒暨少宰敬所二先生之

居實相拱山形圓弗陷又弗峭安若覆孟土人號曰鉢
孟山夫山川降神生人其勝也乃以人顯若孔子之尼
丘申甫之崧高是已茲山孕秀二公旣大顯聞斯名弗
雅曷足以傳四方請更名曰完象山形也夫人德行政
藝修於已者也祿位名壽錫於天者也體薄者用塞道
缺者不備皆弗可以稱完若二公者其何不具哉舉斯
名之蓋人與地兩無愧焉者也衆咸曰然遂立石以識
俾後來者知所始云

遊礪巖志

蔣冕

自予爲舉子至官翰林每歸自京師與人談及吾全名
勝恒欲爲礪嵒之游俗務因循輒弗之果及蒙恩謝事
歸忽忽且三年憂戚衰病殆居其半亦不果於遊也嘉
靖丙戌冬祠祭主事鄭琬德甫自桂林訪予湘臯書屋
中乃十一月朔日偕主客主事陳邦偁宋卿謁予繼妻
陳夫人墓於七里橋北予遂與二客同游焉嵒在城北
十餘里深數百丈前後虛明中尤邃杳廣如大屋三數

百楹澗水從西南石罅中流來數十折北去珊珊作環珮聲中有石乳石巢石米而石田尤奇高下小大櫛比鱗次塋徑粲然畝異其形多至數十畝無一同者石田上數步有一石可坐三四人狀如蟠龍煙雲繚繞德甫欲以雲龍名之予與宋卿皆謂爲然觴詠其上甚適自崑口十餘步後至此非束薪燃火則莫能行時積雨新霽高低亂石中澗水出沒其間老病足蹒跚行頗不易兩童扶掖之乃能緩步雲龍石傍別有一小洞舊傳行

十數步寒凜莫前是日從隸中有謂先是數年曾有二
野叟由此前行出城西村落者其言之信否未可知予
視其中窅然深黑未能二三步遽悵然而返還坐石上
再經石田所至緣石磴上下摩挲古今石刻且誦且行
望巖南口益軒豁顧峭壁巉嵒茅竹蒙翳不可行乃循
舊路出徘徊崑口見前知州顧璘華玉所題先兄姓字
悽愴久之緣澗回至普潤寺寺廢已久有二三殘碑縱
橫草莽中命僮從拂拭苔蘚辨認數過漫筆書四絕句

二客皆次韻句後出益奇大兒詹事府主簿履坦次兒履仁皆執杖屨以隨乃命坦兒書之於石以紀歲月先兄以四川左布政使便道過家與華玉同游茲崑未幾轉都察院右副都御史巡撫南贛汀漳進南京戶部右侍郎遷本部尚書尋致仕歸而卒華玉今以山西按察使養親於家予則光祿大夫柱國少傅兼太子太傅戶部尚書謹身殿大學士知制誥同知經筵事國史總裁致仕蔣冕敬之甫也

太平巖碑記

潘恩

獨秀山下傳有西洞湮沒久矣嘉靖某歲靖江王稽於舊志得之乃喟然歎曰夫山有崑地有竅所以洩幽影祕孕陰導陽節宣氣脉達諸人文者也夫人不有耳目乎耳目聰明謂之備耳目聾瞽謂之偏塞之非是乃謀復焉於是聚徒發石啓土芟穢俯視其裏寥廓窈冥越數武而下其容若室其平若砥始而觀之沍乎若沆瀣之下騰其少選也恍若白月之墮隙徐而察焉石髮若

鬟水碧若繪鐘乳垂溜若絕若懸衆色炫耀若龍鱗殊
形詭狀若銀礫金沙繽紛照爛莫可窮詰時董役中官
得太平通寶錢一以進王喜曰茲惟兆哉山靈告予矣
我太祖高皇帝濬哲文明奄有萬國大敷皇極界茲南
海至於今日奕葉重光潤色鴻業元化旁流天發之祥
地呈其秀爰惟我邦錫圭作瑞寶賴其福若此之應殆
將永爲藩輔與天無極者也神明之所酬酢嘉徵之所
來格豈其微哉遂以太平名嵩丙申夏六月朔日王召

廣西左布政使進賢萬潮右布政使涪州夏邦謨按察使貴溪周忠暨恩飲酒樂出遊後園探奇歷勝咸歎茲崑之復也奉令賦詩異詞同旨爰刻山石且屬恩次第始末以標靈異不敢以不文辭

覲賀將行遊廣西諸山記

田汝成

予以己亥十一月分守左江草竊紛紜瘴厲沉鬱岷岵之思無間日夜嘗戲署臥榻云嚙骨不若吞氊遠宦不若力田聞者以爲新語云會有藤峽之役軍需旁午未

敢圖歸明年五月訖事皇上建大本貞萬邦故事省官
表賀而予以序見行擬便歸覲喜不可言乃以閏七月
朔日丙申發左江越十四日巳酉至桂林時屬郡表箋
未集予欲乘暇遨遊諸山而省寮方以簿書交際參差
莫偶予笑謂衡兒曰乃翁乘興獨往耳十七日壬子游
疊綵嵒中空斗折石戶硃研淒風逼人炎囂屏息故又
名風洞也緣北岸則江上諸山旋簇如畫南麓聚景亭
所見如北牖而昭曠過之遂繞寶積山穿華景洞空明

軒敞可布八九筵前瞰方塘秋水澄澈後臨絕壁有平石可坐三四人爲飛雲閣右崖臥龍岡有諸葛武侯祠疊綵寶積二山皆在城中其南麓大街山脊隱隱隆起有碑書桂嶺二字宋所立也其時帥守監司過此即有任子恩然此不在五嶺之數予旣還憇洞中徘徊倦起宗室經舍者以榼酒孟菽餉予曰聞君發興願助豪襟便與藉磐石笑飲三觥而去翌日癸丑陸選之李稚大聞之以詩嘲予有貪竒凭枯藤畢竟忍枵腹之句予續

占一聯云離羣屏喧譁會意屬幽獨二君笑曰將謂我
輩獨無豪襟耶會給事中朱敬之廷臣以使事入省省
寮祝允緒洪玉方輩約予酌朱君隱山予曰昨望虞山
有奇趣已神往矣姑畢我願乃追隨爾遂出北郭五里
許陟虞山謁舜廟廟後爲二妃祠祠後爲韶音洞南軒
張敬夫所開發也石門窄隘中長十有三丈朗然虛明
北戶清江橫前水石相激爽氣披襟爲皇澤灣以小筏
沿江南轉爲黃陵洲洲上竹樹藹鬱可風並岸爲南薰

亭瞻對江山秀色可攬遂繞城西去十里許憩張氏園
副總兵公別墅也其植多榕多蒼筤之竹少選徑田中
入朝陽洞則朱君暨省寮咸集矣隱山舊有六洞惟此
可尋懸磴層起北戶絕壁百尺俯視木杪洞中有磐石
勒爲棊枰俗稱爛柯石山下舊爲巨湖七百餘畝唐刺史
李渤所開可以方泳芰荷烟雨綵鷁牙檣景物之美
吳武陵記之甚詳尋就堙涸宋經略使張維復濬之溜
水滄泓增置臺榭植竹藝卉侈於前觀元季爲田迄今

荒壤蔓草狼藉狐兔之居惟蒙溪湍澗猶存一帶陵谷
遷易亦可歎也遂携榼而西穿回龍洞洞口廣坦可布
六七筵浚澗中斷駕板橋渡之攀蘿陟巖有亭翼然時
返照射人涼颼揚袂洪君曰振衣千仞岡此其近之衆
曰然遂揮翰揭之爲振衣亭也循崖右轉扶竹欄而下
過藥師寺謁慶元伯祠伯李氏孝穆皇太后父也爲賀
縣龍塘村人后初以俘媛入侍實誕敬皇甲寅偕諸僚
及朱敬之遊七星山去城東里許錯落如北斗之形下

爲玄風洞陰氣鬱烈盛暑如躡層水禁淖不可久處傳
曰空谷來風又曰盛怒土囊之口然諸崑洞亦有無風
者豈地脉差殊與宗室約跋爲予言崑洞冬時溫如附
火蓋陽伏之徵也繞而西爲棲霞洞內極寬衍兩崖石
乳凝結刻畫崢嶸蒼翠漬潤若佛剎畫壁頂懸金鯉髻
尾狎獵勢欲騰騫稍深即窈黑秉炬而入所見益奇瓌
瑋百態其最肖者漁父施農偃僂踏船彷彿若畫中多
岐路云通九疑然未有探極者洞口有老君像傳唐明

皇所置故又名仙李崑崑前有齊雲碧虛二亭今廢矣
僕從亦貪竒擁入迷失道者六人經宿不可出翌日乙
卯以燭出之遂偕都指揮使顧良弼以小艇穿水月洞
泊訾家洲洲上舊有亭榭乃唐都督裴行立所營而柳
子厚爲之記者今皆蕩滅而環山洄江夸竒競秀之景
猶存舊觀遂遊龍隱崑崑口臨江水深莫測仰視其上
有龍迹夭矯長竟數丈鱗鬣宛然疑龍蛻去迹印泥上
久而化爲石也左有石屋寬朗可容百人頂鐫元祐黨

籍一通以司馬光爲首豈諸賢削迹龍蟄於斯與緣磴而上舊有驂鸞亭宋郡守范成大所剏也今改怡雲亭稍北爲月牙崑捫蘿而上石磴數十級崖室半懸形如初月故以名也還舟過花橋泝灘水艤伏波山入還珠洞相傳昔有漁翁入此遭睡龍竊其珠懼而還之龍猶未醒也又言馬援征交趾載薏苡而還旁有石柱去地不合者一線許乃伏波試劒石云此皆幻妄無據今洞中石上有巨人迹紋理如刻復有紫白二蛟長數丈蜿蜒

蜒相向有圓暈如珠直其首豈還珠所起名與舍舟登
逍遙樓望海陽山湘漓二水所自出也同原別流南北
分瀉灘水南下繞桂林合癸水激伏波山下諺云癸水
繞東城永不見刀兵頃之屬郡表箋已集乃卜翌日丙
辰拜表導出東門還集風洞徑山中有二穴高數十丈
仰望開然予曰其韜怪物者邪披茅而上可十數步峻
絕無蹊便棄履躡之入初穴宛轉達於高層倚穴下瞰
掉眩欲墜洞中有石板橫施可容兩榻遂命之曰巢雲

洞予既歷諸崑洞亟與蘅兒言之蘅技癢請往予曰卅
角之子烏知山水之情哉蘅固請乃遣兩卒導之數日
而盡歸曰天巧有餘而人力不足移置蘇杭之間當絕
品矣是夕宿舟中已未解纜三司會餞於東城日中而
罷陸李二君謂予曰儀部同寮至此復散矣蓋陸君已
得報轉廣東右布政使相對淒然遂聯棹送至訾家洲
而副總兵張君亦拏舟出餞邀二君同行七八里艤關
雞山西瀝修竹一圍蒼翠可愛張君曰其下有君子亭

舊年爲水推去予曰清陰若幄何以亭爲遂携榼藉草
而飲薄暮三君別去時吏人已遣案牘已輸舉止蕭疎
肩若弛擔移棹入南溪將游白龍洞暝不克登詰朝登
焉崑扉呀豁略肖龍隱其西爲劉仙崑異人劉仲遠飛
昇之所乳竇窈窕爽氣淒清旁有履痕若攀躡之狀俗
呼穿雲迹也還舟遙發過南亭驛游甘崑崑若剖甃外
窄中穹輪廣畝許以舸舩入焉西壁有泉側出湑滙崑
中深可二丈下睒沙磧游魚如指者三五百頭往來追

逐若與客戲者大抵桂林嵒洞爽朗莫如龍隱邃奧莫如棲霞而寒冽寥寂兼山水之奇莫如甘嵒之勝甘嵒名義無取殆以泉甘之故而土人訛爲官嵒不可解矣是夕宿嵒下辛酉至陽朔推官陳紱教諭黃文典來見壬戌至平樂僉事操君松邀予登鳳凰山三亭疊構巨松環繞俯矚城闔時返照橫江淨若曳練少焉嶺月半露景益清奇癸亥發平樂城東里許覽耆槃澗魯般井廣丈餘汨沒草莽午過彪灘徭賊百餘人踈跣禦客舟

人惶恐有棄楫而泅者予曰賊逼近若此而走以示弱
是召之也遂麾兵逐之發毒弩交射矢沓如雨移時賊
遁去乃免是夕宿梢磯甲子過甌灘覆一從舟時江涸
磯危舟行石罅每下一灘激浪過顙履險不陷殆天幸
乎是夕宿上仰堡乙丑仲秋朔宿古欖堡丙寅二更至
蒼梧丁卯辭軍門遂遊水井寺有泉正出唐經略使元
結飲而甘之作漫泉銘隔江二里許爲火山故有火山
無火水井無水之語宋知州任詔砌爲雙井右清左濁

至今存焉先是予以家累在潯州託翁仁夫移之至是
會於蒼梧因念仁夫年好離居不可不覲乃以己巳泝
藤江往別仁夫而仁夫亦以送予東下夜會赤水共宿
舟中庚午同至蒼梧辛未朱敬之亦自桂林畢事而返
遂方舟齊發仁夫相送過繫龍洲而鄉官員外郎馮世
立承芳亦送予二人同泊李家園祖帳爲別園中多修
竹怪石蘭蒲橘柚有荔樹一株陰覆四丈許下羅石鼓
七八座有石坪可奕右垣有泉淥然引之亭中石牀刻

道屈折流觴焉又西方塘磯石可釣亭榭無他巧而野趣天然亦嶺右所少壬申仁夫輩別去夜半抵封川

遊桂林諸山記

表 表

余到桂林者旬日即下蒼梧病瘴瘧還省上章乞骸骨不報臥病四閱月復出視事乃七月二十日熊師子敬邀余觀劉仙嵒出城南七里得白龍洞俯瞰清潭石室窿然敞而高唐李白命曰玄嵒宋更名白陽其陽即劉仙嵒也相傳仙人劉仲遠居此歷磴而上洞府高寒旁

有穿雲仙磧兩崑望中陽朔諸山森若劒戟皆獻奇目
前應接不暇明日登桂山疊綵崑觀風洞歷華景山下
有洞深廣如厦屋轉寶積山山多怪石其旁有呂公崑
山之巔有諸葛亭或曰珠合無所考又明日出就日門
東北行十里餘得清泉寺復二里謁堯廟淙淙可聽雜以
山觀天子田山有泉分二澗繞出堯廟淙淙可聽雜以
松風如怒濤決浹桂之山皆石此獨土蓋桂之鎮也是
日復至七里山入棲霞洞穿曾公崑而出桂多崑洞然

深奧怪奇未有逾七星者也復觀玄風洞而還二十五
日將趨全州至虞山謁舜祠觀韶音洞讀宋張南軒碑
記山石奇峻下臨灘江旁有渡曰皇澤灣洞口有南薰
亭唐宋刻石具存余嘗讀范石湖評桂山之奇爲天下
第一今乃知非虛夸也夫其千峰挺拔怪奇誠天下所
未覩也然猶恨其多險峭孤危而無高厚蜿蜒之觀是
以無有鍾靈萃淑卓然名世者出乎其間而徒徭獠獐
狍盤據鼠穴枕戈負弩以爲民蠹豈山川之險怪固生

此類與

游乳洞記

余既試士興安問山水之可游者得乳洞出城西南十里路多榛莽至洞口有清溪石梁洞有三下曰噴雷中曰駐雲上曰飛霞下洞有泉流石壁間漚而爲溪觸石湍激有聲洞門軒敞其中虛明夏涼而冬溫其下石如田壟溝塍如鑿左旋至中洞烟霧冥濛有石柱三及石室石牀復左旋百步至上洞石門平曠水淺可涉石乳

玲瓏有五色石橫亘其上秉炬深入石愈怪竒三洞蓋
宋李邦彥名也有碑記及張孝祥大書上清三洞皆在
下洞口上有范成大詩刻徧讀之小飲下洞而歸夫桂
多崑洞然三洞並豁亦足竒矣興安風土簡朴氓不知
遊而三洞者竟不能閱見賞名流如范張李諸公將山
川發靈因人益顯與譬之士苟有竒雋瑰瑋雖在遐壤
必能振奮施其聲光鵲起穎露欲自閎匿不可得也余
於茲游重有感焉

太極洞記

茅坤

予放舟陽朔江上諦觀之其峰石皆拔地而突立最高者四十仞有餘其次則足可三千仞又其次或百丈或五六十丈最次則三四十丈焉止矣其色如豈青深者如靛文如魚鱗總計一百八十里排衙列戟目之令人神思飛越中流偶覽石壁竒瑰異常見伐鼓鳴鐃而前行者忽焉而入崖忽焉而遡波以故追蹤躡迹汎漁舟探之乃得一洞可方十餘丈小可數尺其游儵稍稍見

也俄而赤脚沿岸以入又得一洞豁然當天而竅日光射人且穿上羅下焉方數畝水可十餘尺而漁人網魚而出者盡滿囊也予前問之曰是何魚之夥也漁曰茲洞既邃與人間絕故左右之夸與井里兒童並不得過且水源深故所聚魴鯉數多我輩得以數取之予同王使君撫掌大笑因名之曰太極洞

柳山飛來石記

周宗正

予始至全陽登湘山見所謂飛來石者詢之老衲談甚

悉云自羅浮飛來予意羅浮去湘山數千里卽有神物挾之以飛亦未應若是其遠况羅浮之石嶙峋南海之上不下千萬區誰能歷其地而驗其飛去之迹果與此石度長絜大乃知其的自羅浮也石而飛已可駭愕而謂飛自羅浮則愈怪誕可疑矣無何西山陳王客虛峰陳黃門二先生招飲儒素堂酒半具言柳山書院壬寅四月七日午時有石一區乘風雨雷電飛入應泉井中頭昂尾低狀如龍馬此耳目所逮時日無幾殆非傳聞

影響者比予方疑湘山飛石而顧有此即日偕寮宋憚
子袁子往觀之見其形狀頗具高可三尺長可六尺濶
亦不下二尺有奇重可數千斤即使好事者舁而措之
非二三百人舉之莫勝況其自墮井中僅與其周遭石
甃廣狹相當雖人力巧爲排妥亦不若是之湊合而無
牴牾也訪之守者云其日午時風雨晦冥雷電大作初
未聞墜壓震壘聲雨霽雲收忽見池中有此石也噫亦
奇矣

沖霄山記

張瀚

蒼梧鎮城北枕大雲通星東聳金石西峙朝臺南俯大江江上諸峰巖嵒羅列如屏如案舊名火山謂其上夜光燭天相傳水有明珠又云南越王佗埋劒山阿莫可考證居民往往戒火十日不雨閭閻祈禳獻賽金鼓相聞問之曰火山相對故多火災不禳疑有害夫山川興雲注雨利潤民物故曰說萬物者澤終始萬物者山奚不察夫山本有利無害而徒稱名之惑也山本無名由

人始名稱名自我乃妄意詫山惑甚矣龍劍在地則劍
光生蚌珠在淵則珠光生闇然彰明若錐處囊中其末
立見賢才處世亦復如是邇年梧郡人才幾於不振顧
茲萬山盤紆兩江縈帶當五嶺之中挹九疑之勝山高
水深分野在牛女河漢間謂非渾融佳麗濶達宣朗不
可也其所凝結會萃於人者豈不然哉今學宮坐對此
山尤近余竊於斯有深意焉改題其山曰冲霄冲傍從
水霄上從雨皆以制火且不失夜光之義旣以解愚氓

之惑重爲士人祝繼自今賢豪奮庸雲蒸川涌用匡弼
我國家以道德文章豐功偉烈掀揭宇宙不啻山川之
光芒上燭即靈鍾秀孕焯爍霄漢不在珠劍而在人賢
矣既手書三大字勒石仍識諸碑陰俾生育斯地者永
以慰且勗云

粵西文載卷二十

欽定四庫全書

粵西文載卷二十一

桂林府通判汪森編

記山川

游桂林諸巖洞記

董傳策

余閱宋范穆公成大桂海虞衡志見其評桂山之奇以
為千峰崛然特立旁無延緣而玉笋瑤簪其森列怪且
多若此當為天下第一私竊意其為過言乃今來遊桂

林覩諸峰巒巉巖從平地削出數百千丈不假纖培而骨相嶄然玉立劒峙衆態畢呈或半空開竅冥搜詎測或挺拔天表登頓無階其奇怪奪目驚心殆不可具狀昔人所以論列猶為不及云余得稍遊覽其最著者采合傳志因為撰次於左略諸瑣瑣不記八月二十有四日余與吳子泊舟桂江西臯復會張子子儀是日學憲殷石汀君邀余三人遊風洞巖巖在疊綵山後石門磴研峭壁劃裂下瞰平野千峰競奇雲樹滂勃洞中陰風

襲人毛灑灑起立張子謂即當盛夏無暑而殷君遽持
觴起飲復為指點桂山三峰龍從宛轉悉入矚界蓋竟
日酣眺焉賦得古體一首明日張子去余二人結纜伏
波巖嵒突起殊高石懸如柱去地纔罅一線俗云馬伏
波試劒石入而有洞豁然約可容數十榻戶牖穿透俯
瞰灘水洞中踞石有巨人跡宛如刻紋又紫白二蛇蜿蜒
相向有浮石絡其頂大似老龍戲珠洞因得名還珠
或云馬伏波傾所載薏苡於此因賦近體詩折而遊眺

水月洞洞門踞江圓如滿月一統志稱濱江洞惟水月最佳然不能過還珠洞也已又登崖望獨秀峰孤標直聳頂平如蒼玉正面凝然秀整側視米如卓筆校諸峯獨雄唐張固詩所稱南州擎天柱者也其北虞山臨江有韶音洞宋張南軒先生有記刻崖間又明日遊隱山六洞余憶寰宇記唐李渤出鎮桂管見石門大開有水泓澈迺疏鑿巖穴石林磴道若天造靈府不可窮詰因名隱山蓋即其地也山上六洞為朝陽夕陽南華北牖

嘉蓮白雀洞各一天朗敞如厦屋雲門逶迤亘薄野外
俯跨田疇絕幽雅真寰中勝概也唐吳武陵韋宗卿俱
有記由隱山轉出去七星巖甚近余二人復挈周山人
李生往遊焉巖有七峰列如北斗旁垂小峰如輔星緣
磴而上山半有亭曰簪帶亭其下為曾公巖山根石戶
中有澗水伏流宋曾布帥桂跨澗為石橋因以名巖橋
下水聲泠泠寒氣侵肌橋側有石乳雙懸如垂蓮頽雲
危欲下壓度橋有石池徃昔鱗遊其中今水稍涸復過

野田數十步路逼窄不甚可通頗視有石罅尺許匍匐而進忽更高廣其側徑可詣棲霞洞洞旁水清淺不流岸塹如削余二人從石門而入頓覺坦夷爽塹約可列坐數十人其上石乳凝結下復有洞名玄風初視洞口甚低遊者秉炬捫壁以進天門三層層各三耳前阻大壑不可渡有路北行頽僂而前數步復寬衍兩旁十餘丈石柱下垂如玉簪珠旒曲折躋攀所覽觀彌奇高下斷霓從空散落斗室陰崖森幽徹髓從者慄慄持酒榼

為各酌一巨觥復行食頃珍窩怪石交撐層峙殊形詭
狀盤巖竄頓其中詩者難工畫者難巧即遊人猶錯迂
相望稍認識漁網燈檠無量佛逍遙牀獅象駱駝神工
斧出宛肖人間世所有又踞老君像甚古唐人因號為
仙李洞張成子詩刀圭影觸金丸彈謂洞中景也洞倚
層巖極玄遠扣其響石如鐘鼓鳴余輩數人語笑聲如
大甕中聞雷喧隔塵世而崖棧間澄水一泓匯成深淵
路滑蒸崎嶇側行絕險凡三里許始從頂上出世傳穴

通九疑山以故其祕竒特甚余意天壤間仙靈所棲或
未必勝此即桂山多竒然如風洞之陡然劈出朗朗相
屬跨為六洞之益竒至如七星巖轉折獻勝重以玄風
洞幽邃不易究竟又其最益竒者也劉牧詩陰崖走別
洞陽嶺帶迴溪信然信然歸舟各賦近體詩夜深方就
寢明旦起眺江涯將復遊他所適巡院藩臬諸司出貢
院來訪於是諸舉子亦來而秦生者道其父發解時遽
棄去遊仙不復返今其母尚在也余笑曰粵山好竒乃

其人豈亦好奇若此午後往東北遊屏風嶺斷山高聳
中有平地亦甚敞鍾乳倒垂透石穴而出山川城郭恍
然如在壺中范成大建壺天觀空明巖刻銘於石又東
遊觀龍隱巖灘水分繞其旁下有洞深奧莫測龍迹天
矯然印其上於時桂林諸嶠洞之奇大略已得遊惟華
景洞在城中逼近王公府遂不復入而堯山有堯田特
以桂山多石惟此獨積土蓋無他奇焉日晡放舟象鼻
山山在訾家洲之西突起水濱厥形類象余輩方箕踞

眺嘯適藩叅洪方洲君臬僉向懷葛君載酒來尋遂歡
飲至夜分而別明旦發舟下西南境入戍所道中山水
猶奇乃更瘴靄迤靡四望荒落猺吹猿嘯聽之淒淒然
余顧益猛有躊躇愧戍縻非其柄也因憶姑蘇袁永之
氏遊桂山記謂其山石險峭宜生蠻獠獠獍之類為民
蠹又意淑詭奇偉之氣不鍾之人而鍾之物余以為不
然夫人寰風氣寢開拓荆蠻於越曩亦榛疆八桂雖遙
良非殊域且石巖巖等耳失之邪或歸險峭得其正堪

秉孤貞彼其人靈心故在也抑天王統壹區寓覃牧黔
黎詎應鄙夷絕徼中謂必難振禮教古今俗移須政植
政維人特患分疆宰割者未暇經籌云爾夫山川草木
夷裔之主非其人誰當焉又安知八桂諸巖洞之間異
時不有賢豪士出而剪除荒穢興起斯文與天壤相終
始也漫并附麗之記中庸諗後人之好遊者因復得粵
西山水歌一篇云

渡灘江記

湘水經興安海陽山斷為灘水流而沂靈川其渠甚偏
仄本秦史祿所鑿今置斗慎啓封云斗畔悉蒼莽區曠
無居人時時有蠻獠數輩持挺倚崑谷間幸其蠢蚩無
大害然客遊者自此非夷境矣獨桂林當最高處控制
數千里披山帶江裒然西南要會世謂桂嶺摩天灘波
經地水環湘桂山類蓬瀛迺猶離郭伊邇遽嘯諸獠屢
邑古田永福間大為占據朝除宰貳至不敢入界予予
從省司候差遣余蓋覩而憤焉自桂以南迤而接乎陽

朔昭平旁及左右兩江藤峽八寨大都諸獠深阻今惟
府江為尤甚府江即灘江也以迫平樂府名府江又以
灘水流至此益疏迅名灘江余素聞其險爰與吳子留
連桂林數晷須諸藩守出棘院挈之行至是九月五日
發桂林越七日渡陽朔道中巖石尤奇崛就其羊皮元
寶諸峰突兀空透飛挂疊數節下瞰牛樂匙鑰天河纏
脛諸灘大非常目所經覲陽朔人蘇御史水追訪舟次
語中更及灘江苦險阻余輩兩舟人有戒心云是日逾

燕子巖白面雷公諸山徭人村八日渡龍頭磯出灘江
兵憲林君載酒餞江許已而兩舟人與藩叅吳君梧邕
守何郭二君並放中流日晡泊長灘九日晨發吳君舟
觸石幾破舟中帶有人匠粘罅至旁午復發於時瘴霧
彌野山川咸不可辨旁午猶無日光吳君設桑寄生酒
邀余與吳子酌之云敵瘴氣復出鴈蕩山茶烹以解醒
吳君雁蕩人也語中誇雁蕩之奇余笑曰若不覩此灘
江景乎夫灘江水波層絡下春石齒兩岸皆高山峻谷

然吾儕身渡之不得遊抑不可一瞬目焉即若所談中
土奇遊不且重有感怙方覆澤哉不且重有感怙方覆
澤哉吳子遽障余喙曰子又酒發矣俄而憲縫稍豁因
捲簾矚兩岸山迺有獐惡獠人數百羣挾戈戟伺險灘
上余輩幸舟順流其遡而上者篙稍緩輒被逗留鹽米
吳君蓋坐而目擊之與余輩咨嗟良久因憶田少參汝
成藤峽府江議謂勦藤峽寇宜速勦府江宜緩又有疑
勦撫二議誰適從者余覽觀其概大都江峽勢相連繹

未應異治諸獠志索鹽米非有遠圖彼中洞丁招主往
往釁狀相通今昭平建設王巡司亦畧扼其咽喉謂宜
聽諸土官報効兵自齎糗餉勦逐苟得尺寸地即以立
其支子為巡司官仍於要害處隨在設巡司令通峒丁
鹽米禁其侵暴久而化誘諸獠為良民因可潛消土官
諸子弟相讎殺事或亦一籌策耳日晡泊大龍灘十日
晨發午抵昭平復逾馬難唐釣上曲下曲石龍諸灘至
上洋堡泊十一日發上洋堡逾上洋下洋蜆殼龍口月

口爛板諸灘自出灘江諸灘俱險而馬難尤甚水當灘處湍洶若飛矢石共共錯兀其底溯流者篙竟日難上順流尤虞觸石灘旁復多滙深潭其上嵐氣重遮鼻中聞之至不可忍四野箐篁邃蔽鳥棲絕少時有二三水鳶墮而前昔人所稱仰視飛鳶跼跼墮水中蓋實景也柳詩千山鳥飛絕萬徑人蹤滅又添嵐瀧徃三苦云十二日舟抵蒼梧漸覺岸有人迹間見一二小舟蕩槳而過然猶數十百里無村煙江灘亦尚多險迴憶江左風

流不啻霄壤云爾日晡何郭兩郡守置酒馮大夫園中
邀余兩人話別二君余同年友方有事入覲夜泊蒼梧
明晨南發作行路難詞三十首

渡左江諸瀧記

九月十三日出蒼梧登閤白鶴觀暮泊羅洲灘十四日
渡藤縣宣洲縣產蚺蛇釀蛇酒隔江數里為洲洲有孤
村其氓採熬黃藤膏點火眼暮泊大灣自此入大藤峽
韓襄毅公征蠻時斷藤處也十五日渡白馬十二磯暮

泊白馬堡十六日渡黃婆五龍諸灘午抵平南復渡大
小黃岡諸灘暮泊牛石堡十七日渡銅鼓灘自出蒼梧
通海潮其瀧水多濁不類湘桂清流至是水分兩大支
一入左江一入右江云午抵潯州王叅戎夏尹諸官入
訪談銅鼓之險暮泊前村十八日風泊十九日渡浪灘
吳子選日到橫槎遽并力先刺船去暮泊石門自蒼梧
來鬱蒸不異盛暑至不可衣單衣而搖櫓人裸程袒裼
猶汗流浹背至是忽雷聲震烈雨大作如注頓覺瘴氣

疎爽人至穿夾襖子云二十日雨泊二十一日渡大壬
灘時風雨猶颯颯不止秋氣蕭然江中悄無行船岸多
叢蒿其路通諸蠻洞雖逆流不可挽纜惟以篙櫓施中
流焉暮泊石龍岡猿聲清淒孤舟雨夜不能不攪離人
臆也二十二日渡貴縣馬騶諸灘暮泊六村埠二十三
日渡大急水小急水四層諸灘舟子云其地多剽寇暮
泊鄉江二十四日渡大銅鼓馬槽烏蠻龍門泥壁諸灘
而烏蠻尤險灘流駛處噴如匹練中突巉巖亂石作澎

拜旋舞狀迤邐幾三十里是日風順舟子猶努力撐鐵
頭篙雖陰霧中至汗透其衣自辰至申始克達云灘上
有漢伏波將軍廟舟過者必謹謁祀余作詩弔之其云
志託風雲堪躍馬身依日月尚還珠蓋難其遭也於時
鷓鴣倒掛諸異鳥啼聲徹耳老榕蟠腫祠畔令人益增
悲歌感慨之思焉二十五日渡黃泥苦竹諸灘因憶鄉
人贈行詩云落日玄猿啼苦竹秋風黃葉下烏蠻實境
語也午抵橫州晤吳子相與話橫槎風景因入訪其旅

舍署州陳節推君攜酒過飲暮泊橫江二十六日天始
霽辰發橫江渡上下三十里灘暮泊蕭李埠二十七日
渡磨麪諸灘野泊二十八日發數里抵火燄有雷埠磯
風勁甚不可渡遂泊二十九日風泊三十日晦晨發渡
老鼠洞諸灘泊十月一日朔渡永淳其令朱君挾鄭博
士追送自此而上水稍平二日風泊三日渡伶俐水入
宣化界起視其境殊荒落多出異竹木數十種至桄榔
木本類竹尤奇野有胡蔓悶陀羅草能毒人村墟市果

菜及擔負行者皆婦人蓋其俗如此四日泊長沙五日渡黃范午抵南寧余便登其青秀山兵憲程君郡邑長帥廖吳諸君咸勞余於郊越九日始入戍舍迺於是輟瀧游而棲遲逆旅焉

青秀山記

粵西奇山水大都在桂柳諸境而邕潯罕著稱焉意其湮沒瘴徼諸民人茂樸不好遊無從搜剔荒穢即有奇安所得覽覩若邕之青羅二秀雖已昭昭人耳目然羅

山峙僻村無甚奇青山即跨鬱江可常游其中石泉清
甘絕頂洞朗朗如天窟悉皆翳棘莽礙礙徑石又亂出
障其竅即邕老人不一步而知矧諸寓紳忽漫游余得
淹卹茲山數出探諸勝絕處稍稍為棲息計迺亦居久
之始得石泉於叢草中遂剪其蔽為石龍口盛之以便
汲吸又久之因挈友人避暑山巔箕嘯連日夕始從絕
頂上望見巖際有數隙相視罅中塞土意其為古洞遂
掘而得天窟焉以余得之艱於是邦侯鄉大夫各各為

余結構其上亭榭臺池宛成勝境余既屢從諸人士游賞不能徧憶記爰記其山中景各為命名以須後來人記曰青秀山故當郡右去郭可十里高不下數十百丈有上中下三層廣袤幾數里厥背負陰厥面迎陽厥陰介陸厥陽臨江客游舟而馬者良便云山勢自東南來連亘西北迤若蛟螭矯若鳳翔一名鳳頭山其左有蛟潭今聚大魚噴潭水有聲離潭里許為山麓游者從中而上有石級歷級數仞一門累石而成是曰石門門之

上有大巖里父老緣而屋焉屋凡三楹四面皆石楹可容數十人巖氣從屋中騰騰上命之曰煙崖石屋屋右道狹而峻有石壁濛煙蘿俯眺鬱江殊清曠是為滄嶼蓬瀛壁傍循級而登有巖層而窟者連絡如兩斗命之曰雙斗巖其頂平疇一幅蓋鋪出二里許云屋左道甚坦厥石削如屏者稍聳峻道上行可三十步有泉從石中出清若水晶甘若露凝泠泠然晝夜注不舍村民汲以烹炊視汲鬱江水便數倍游客尤藉之解醒濟渴

云即余所尋得盛石龍口者也歲辛酉夏郡守郭君守貳張君以余故為亭其上余以原泉混混可喻學有本命之曰混混亭未幾分巡兵憲徐君行部至境謂余雅好斯泉鐫泉畔石曰董泉遂更名亭為董泉亭刻詩其上余並得專泉亭之幽勝云亭下有臺臺外有池種蓮是曰青蓮池出亭緣土級而登厥道亦坦又可頽視諸空濶處余因自築臺一區命之曰白雲臺而徐君復檄郡守方君輩於臺上構室三楹命之為白雲精舍鐫其

左高石曰青山白雲右曰海天一覽余復於精舍中題
榜子云天空海濶中原界雲白山青萬里心寄思也巡
君因為白雲精舍記碑之舍中而守君青山記復以茲
山歸重余余殆莫能當焉舍左有片石如劃為余試劒
石其孤聳可眺鬱江者名釣石從兩石中道上爰達平
疇平疇者謂山平行若田疇然蓋積石中獨包曠土亦
一奇也疇上塊石疊出中夾青松數百株旁插蒼梧花
覆之方池爰有村民數家巢其腋宛若仙家左卧仙人

沖退石仰控履迹俗呼為仙人履其方而蹲者介莓苔
間題曰松風水月循疇而登有古佛寺寺鐫元人碑記
厥名青山寺文辭剝不可讀寺石有巖甚奇命之曰遲
仙巖巖上石乳滴成池是曰天池蓋泉脈也巖頂有洞
曰天窟洞有門曰玄玄門即余鑿塞土命名緣門側足
而上有石壁一片厥形平厥色赤命之曰天南赤壁壁
鋪平臺寺出其下爰臨而眺其面五象峰朝焉天覆如
蓋江環如帶余每坐而心賞其中郡因為作小亭通四

面余復名之曰浩浩亭蓋援浩浩其天之義庸戴明時
浩蕩恩云而巡君更題其洞為洞虛刻詩扁亭上亭之
下有小巖峙其左是曰卷石崑崙左復有坦途行人繞
出其背即所謂負陰介陸者也其東沿途而上大塊聳
然遙挾岡脊有古石佛在焉是為山額蓋赤壁為鼻寺
為頂平疇為大腹而原泉斗巖夾其雙腰鬱江圍其四
面厥脈連如貫珠然以故山不高而秀水不深而清較
視西北之險峭為善云舊名青秀山今仍其本象廓然

子曰余記青秀山之奇蓋不敢以余譴辱山靈焉雖然
余得澹澹然游茲山假之逍遙戍鞅即茲山不應舍我
作主人矣謂余記之為宜嘉靖甲子春正月上元日記

遊南山記

余夙聞貴邑南山之奇初入戍渡貴雨不克游庚申送
家君出渡行遽不克游還而再渡王少府預設酒招遊
有主人矣迺余心緒愴然又不克游及是始獲與陸山
人同往游云既渡江登岸興行可六七里望見野疇上

有青嶂數撮至則其撮高者有窟如大甕窟中有竅如門入而景象軒敞約可列坐數十人亦奇巖洞也崑上鏤佛象俗子更覆屋椽焉其左復有一竅空透石傍鐫流雲洞三大字洞之絕頂又復有洞甚奇天窓晶晶然石乳初零棧壁如劃較視橫槎空洞巖差小其層邃複折畧相似因口占一詩而還復與陸山人箕坐江邊老木上木中空穴宛肖巖狀遂名之為木巖余顧陸山人曰假令蜂蟻攢游其中寧不類吾輩游南山誇奇乎相

顧一喙登舟北發

雷埠石壁記

雷埠磯在永淳之南去火鰲可里許厥石聳突成山廣袤數十丈戟而森森者龜背者駝而負者鳳舞而豹蹲者環旋其左右兩崖相對夾之湍流厥壁峻立如巨障復突一峯者於江心互其崖石宛成二門粵自橫槎而上諸瀧惟此為險諸瀧之石惟此壁為勝余初入戍渡此方搜奇時未暇搜及也至是挾友朋出遊既得之喜

甚爰告歐陽巡道鑄石巔而歐陽君欲鑄余名余笑謂
名石不名余乃相與假重王陽明子鑄之云董子云余
記雷埠石壁良怪物有遇不遇焉夫斯石壁者余即不
出游雖經一再渡之猶畧而過矧諸未得渡者與然則
奇巖石之泯泯荒僻者又可知已雖然石無奇不奇人
奇之即奇苟不奇之亦不奇夫石塊然無問奇不奇其
又奚假余輩名哉

衆妙巖記

永淳縣之北幾三十里有村曰滕村去江幾三里村突
衆山環而拱其一有二石插左耳各聳了髻宛若仙
人厥山面乾而背坤中開大竅朗然一室室高二丈許
縱之深於橫寬可坐百數十人是為廣莫室室中有石
仰而若吸厥狀類蟾蜍名之曰玉蟾其蹲而坐者曰獅
子坐背石削如屏曰石屏石尖而懸厥文若裳曰石裳
室之左有隘竅游者燃炬而入行數步寢廣有門訇然
夾以石柱名之曰一天門中有石臺平而邃若龜是曰

石龕其上有石鸚鵡循龕而行後有一門門之奇逾初門名之曰二天門入而厥道彌寬有石踞且昂其首其上有月形俗呼為犀牛眺月背有二石室一室有竅通天名之曰天窓循室而左後有門門之奇尤逾二門名之曰三天門其右有窟徑而長游蹤率置不入爰入三天門門列三石室厥道彌寬且平轉履石級緣之方臺不斷而坦厥石立者斜倚者卧者垂耳者肩而摩若負持者曲肱者背而坐者蒙衣者妍者舞者肖衆形者鏤

文者空而鳴者錯而森其中也是為衆妙洞天於時逾
一小橋橋濛煙苔側足而渡下有清淵泠然注不舍石
頂有大佛神工斧出宛成貌象厥乳滴而成柱名之曰
佛柱有閣曰佛閣循淵而入其左有窟甚長右一窟有
響石厥聲鏗然俗呼為銅鼓隔淵有石合而中開削成
龍象俗呼為卧龍石其傍有窟不可渡沿厥故道出二
天門左有徑窟可達廣莫室歲壬戌春廓然子從三仙
客游茲崑也仙客者謂玄之又玄衆妙之門於時括而

名之曰衆妙巖

游貴縣南山記

張佳胤

山川以經緯乎兩儀而呈形乎日月之所照臨所謂靈境仙都尤多顯於彌邈幽荒之域載在山經竹書可觀已後世好遊之士凡勝概之在中原者窮備舟輿櫂楫杖屐之物卷石勺水一草一木原本命辭疊賦累吟甚至流連光景放形自廢狂呼無賴與振發清言為風流之宗如晉王謝諸人是也若乃五嶺之表古所謂冥域

絕徼人迹不到爰有高曠之徒如唐柳宋二蘇者以屏
斥憤鬱之抱寄情於巖壑煙雲之間遺迹片言輝輝瘴
嶺而有餘光豈非大荒之外賢者之迹為難乎貴故嶺
外小邑有崑洞在邑南五里許余行部邕橫返棹豚鬱
之水見江上數峰削起如畫心樂之時方與叅戎亦君
慎菴議略山峒事狀常思臨高以得地形亦君要余游
其洞而觴焉仰視垂乳萬狀竒瑰好事者作浮圖像於
中傍多石竇游者僂躬列炬宛轉捫蘿而后造其絕頂

嶺有石室方丈爽塏空明指顧四際北盡柳桂南盡雷
廉東盡潯梧西盡駱越近則龍山五山賓宣鬱白棊布
雙鳥之下余舉觴屬亦君曰茲景肇自開闢而奇紀所
不收古昔棲遁之賢曾未嘗辱洞中之一盼寧非文教
之未同耶皇明華夷統一百粵號稱善地凡山川明麗
之區皆足以供眺嘯而堪吏者之隱余與君挾策振衣
慨然想先臣之風烈而思圖所未備以貽斯土不窮之
樂其道在問罪兩山之桀落因而和輯其順然後擇他

部酋以君長之并徙衛所屯伍其地而折制其萌又裂
合靈二邑之土城邑九懷以宣明刑政禮樂之教庶幾
翰翼二廣山川無恙乎亦君曰某職甲兵公職錢穀戮
力構會鮮不濟矣茲游也其山川之遇哉余曰山川有
真樂人不得取之以為有非阨於時則辱於志也王謝
柳蘇翩翩有雄俊之風不知永嘉之際神州陸沈而元
和紹聖之三子不能安於朝廷之上故肆為極樂之迹
者正以洩其至悲之心爾余與君仕於熙明之朝可謂

遭時而不辱其志使足迹之所窮初無放廢憤鬱之思
信乎山水之樂盡為吾有視諸賢之遇抑又過之矣乃
相與酣暢和適返於蒼壁之野亦君磨崖而邑博薰草
來請記因書以歸之亦君名孔昭馴象衛人時為左參
將云

遊水月巖記

張一清

鬱林東南行二十里有所謂水月巖云東距勾漏洞三
十里骨脈聯絡斷續欽欽至水月則石更瘦峰越巉削

虛其中而為巖門西北首清澗潈洄曲折遠其外渡野
橋抵巖虛明爽豁中高類蓬壺鍾乳琅玕倒懸錯列其
下可坐數百人澗水迂其中蕩漾奔激微有聲澗之中
巨石蹲踞屹為砥柱由巖石轉遵澗行為陰洞日月祕
而龍虎藏遊必列炬跨木渡澗數十步水石益奇削為
玉蓮伸為仙掌渦而為盤立而為柱飛翔變怪流泉鬱
紆蒼壁之下有銅鼓石擊之能作雌雄聲澗之東有石
竇水半坎把火下照紫鱗巨細洋洋悠悠不避人再攀

援而上數十步婉轉曲折則出於巖左矣山之麓有田
幾坵環列數峰所缺一草亭耳復西南行有峰拔地起
草木森蓊是為天馬洞云洞視水月差小其中佳勝畧
與水月埒外無障蔽有兩石昂首而對峙若上馬木木
之前地平若泥沙視之皆石也有馬蹄迹莫記數迹入
二三寸許洞最幽邃灣環旋轉出入共一門復行西度
兩峰則為釣天洞焉洞頗高門在山之半其下多峻石
蕪利不堪步履須捫蘿偃僂然後至門之內有奇石卓

立若樹塞遶石行數步瀦水為潭斷焉潭夏盈冬涸度
潭迺為釣天洞云洞分上下二界下界臨潭水有石垂
垂下叩之鏗然若金韻最悠有石磬戛之哀然若玉地
中虛撞之皇皇若革越石而登上界尤軒豁天光透明
廣可坐百人下擊衆音鼓鐘迭奏金玉相宣飄飄乎真
坐九霄而聽釣天之韶護謂之寰中絕景非邪復行而
南折而北東二里小峰磊落竒石鑽矗擁為胡椅內巉
峭壁立不可登躡右有巨石石中分為小門僅通人行

從門入是為栖霞菴云菴之背有草亭曰太虛亭亭之
左有小洞二曰隱真曰天谷菴之前匯泉為潭曰浴日
潭左有天井泉味甘冽嗽之冷然由石門而左去山頗
遠煙雲蔽虧林木菁蔥是為得一書院舊址焉予從菴
中出有老父焉蓑衣箬笠揖予言曰君胡為乎來耶君
胡為乎來耶予祖宗耕食茲土不知年代矣耳不聞車
馬聲月白風清玄鶴鳴而白猿嘯君胡為乎來耶予追
憶為童子時喜吹笛聲中律呂幽鳥應節松風遞響意

甚適今老矣時時披蓑衣卧白雲中遍索諸品洞為樂
此非塵凡界也今屬子矣然君所遊僅得茲山之一二
耳其餘蔭薜而封苔蘚者尤多也能從父老遊當授子
以青竹杖言罷而去予心異之姑識其言以為野遊記

遊龍隱巖

胡直

陽月之五日余先出東江門蕩小艇絕江抵東岸其友
黃子劉子從之過花橋橋側巨石拔地數丈有樹相樓
結倒影漾波余却觀裴回循橋南山轉行又有石豎山

角若卓杖愈南從怡雲亭址先入後洞至則二君已軒
軒翔且歌矣洞面西俯江瞰城然不見城獨見羣山之
巔雖隆冬翠冉冉飛几案間矣濶可坐二三千指高不
下數丈上懸若幢蓋後壁稍左有宋磨刻二其一即蔡
京所書元祐黨籍首司馬光呂公著蘇軾劉安世諸君
子凡三百餘人其一為寧宗書字頗道勁二君酌而弔
宋之君臣曰彼京者憑天子命謂足以貶斯人百世矣
不知反褒且遠也自今觀之則孰褒孰貶孰榮孰辱余

曰天下有道則是非在上在當時天下無道則是非在下在後世相與歎且笑出洞石多牆立磨刻宋方信儒三大字頗偉又有記儂智高事折而東即龍隱處初入稍狹中乃穹朗上有龍迹天矯長數十丈鱗鬣宛然疑龍從上躍出印石成文古稱龍拏石如泥其或然與穿崑而出即灘江支流下探不測春夏水彌巖非舟不通今水落舟止停石下予與二君登舟酌酒放歌二君曰巖藏司馬諸君子名所謂龍隱非耶余曰龍神物非隱

非不隱非顯非不顯故曰與時偕行龍何心為乃為歌
曰山之隈兮維龍之宮兮與道冲兮山之闢兮維龍之
隲兮與道適兮歌未闕遂鼓枻去而東

遊隱山六洞記

余既游龍隱則詫於其友合溪子合溪奮曰子不聞有
形游有神游苟知神游則天之寥地之弘日月山川之
羅列與夫草木禽鳥羣物之糾紛何遇非游奚必龍隱
余曰富哉子言然孔子蓋嘗登泰岱觀呂梁樂山樂水

咸有天游存焉第貴勿溺耳故遊而溺者非非游而溺者亦非奚必不遊於是至前之日合溪子命觴邀游於隱山之六洞隱山者唐李渤吳武陵咸有稱述亦名山也是晨西出麗澤門里許至山下小亭憲長桂君都閭錢君咸來乃先尋南華洞洞水浮碧可鑑西轉北牖洞歷夕陽洞愈西至嘉蓮洞或云石似蓮又云昔有水產蓮折北躋一石廣長如牀轉至白雀洞末乃穿谿訝入小門至老君巖即朝陽洞也東對獨秀山上鑱石成老

君像左右垂石彷彿鶴鹿咸天造因共酌賞之愈北萬石巉嵬遂南步而酌於亭良久復南走里許登披雲閣閣據叢石之心延攬益遙或曰是閣當春花秋月彌佳閣內一石立如樹與羣樹混從後北轉為石數益參嵯狀如蓮瓣如敗蕉葉又縱觀四面之山皆石也於是相攜下山穿紅葉林而返

遊七星巖記

是山亦純石巒凡七而巖竅其腹余以孟秋遨其上巖

奇之而未知下巖之奇之難狀也上巖始入有真武閣
回觀灘水西北屈曲入人抱左顧羣峰旖旎雲攢把炬
穿後穴抵巖寬可羅百座上湧濤文勢澎湃左右石柱
凡三北則哆張而天入焉出口轉到下巖門外觀棲霞
洞字遂返輒謂奇止此耳久之聞都督俞公談下嵒之
勝時維仲冬方伯萬公廉憲桂公暨予三人乃敦俞公
偕游於是盛張烈燄令道士前導下歷數十級旋就軒
曠迸出平臺危數十丈上坐老君像下鑱仙李洞字傍

有石鯉躍濤文中再進一色若白浪飛撞虬螭百千駕
濤奔角力不可弛上有石乳倒垂者三滲泉滴下之三
柱若相吻然又進則交撐疊闕漸束就狹道士告曰此
地中天界也是為一天門入門有仙龍潭石欄護之已
而歷第二門中立石柱從傍登降入三門愈益寥濶石
垂乳數十丈者不可勝數變幻詭絕縱橫萬貌不啻闕
秦宮漢苑飛閣叢臺複道井幹璇閨珠箔駢列錯映雜
還蔽虧抑亦啓甲乙之藏發牛渚之怪馳長揚之異獸

森縣圃之若木覩者目眩神颺應接失次道士搪然指
曰是為毬為戟為牀為架為獅為駝為網為氈為餅為
燭為將軍為諸佛為須彌普陀為百果又云穴通九疑
名言固多然實巧畫不能設色瑰詞不能傳神不知孰
生化孰經營至是也旁有大壑澄泓不測或曰羣龍家
焉愈南窈窕偃嶮偃樓行數十步又復泓衍其竒視前
未肯下又數百步為曾公崑約共里許覩天日矣度石
橋始出洞休慶林觀咸若超然自世外歸引觴各舉其

奇不能悉胡子曰巖奇獨珍閔固隱不一暴其倪雖予亦嘗少之豈誠所謂深藏若虛者耶雖然使非能真際其奧者縱獲聞予言尤不能悉也

游還珠洞記

還珠洞即伏波山前麓濱江穹起嵒張中垂二石瑩潔如磨一不及地線許志稱有紫白二蛟相向弗之類也左右石轉相通如夾道後有數穴相傳昔有漁父從穴深入覩物如犬熟寐旁有一珠拾歸或謂曰此龍珠也

恐觸其怒戒令還之故名又云名由馬伏波載薏苡經
此誤謂珠也皆不可知洞中獨宋刻最多其下皆平石
懸水上若與波下上予欲延矚久矣適余友少微邊子
從西蜀至因送之鎮邀共覽焉邊子謂蜀山雖崇峻選
洞遜西粵矣同遊即萬桂二公錢將軍暨予凡五人

迎仙洞記

羅黃裳

萬歷四年夏五月端午余謁督府於蒼梧且計事事竣
泝流還平樂道經昭平會府江雨下如注瀨湍急舟人

有難色余索民間竹輿舁從陸路歷里埠蓬相桃嶺石面諸峻坂盡四日將達平樂郭東十五里有峰峭厲獨峙約高廣千餘尺中扃崑洞儼若天造石屋呼田叟問之曰此名珍珠崑昔有異人棲住煉丹丹成羽化而去余異之修磴援蘿入憩洞中盤桓瞻盼錦石繽紛交錯如垂珞如綴玉如累茵如伏獅馴象詭狀百出中復有石徑縈紆虬轉躡之若上通洞天石牀石臼丹竈具在杳與塵世隔絕余因命石工乘天作之勝聊除榛莽加

甃砌未幾會余覲有行厥工未竟越明年夏六月余復
視郡覩八屯妖氣屏息四方底寧乃更遣千戶朱濂鳩
工繕治之不越月洞前渠道成洞口亭軒成洞心石砌
成遂命僧結廬守之余每政暇偕郡貳林君郡倅程君
司理陳君往遊洞中舉匏樽相對盡歡忘形物表縹緲
此身若跨青雲振羽衣於蓬瀛山島間矣特扁其洞為
迎仙云

潯州白石山記

龍國祿

尋之南妙有之運崛而為石石之高不知其幾千尺也
刺峰為兩翠黛霏微插青天吐白雲歷歷亭亭若削若
滌於是騷人托跡衲子談空吏隱探奇墨卿弔詭而霓
裳仙子時亦蕭颯至焉窈窕莫之覩也道錄者志怪者
也錄之言曰洞天二十一通勾漏洞葛洪脩煉其上丹
竈存焉倘所謂仙窟是耶非耶余自虛無盼望肘怒欲
飛已乃驚雄風度丘墟冽澗薦巵林巒驂乘長松拂蓋
怪石朋迎上嶇嶇達洞門古木蕭穆奇花點綴空明寂

歷雲氣沾衣寺軒然聖漫然棟宇煥然坊第轟然皆新
構也奕奕皇皇窅窅燿燿中宵三寶大佛金碧焚煌余
既肅叅乃始步兩廊揖山僧稍憩禪房上奉三四木主
眎之則鄉先達戶曹甘公叅藩李公郡丞陸公暨若子
庠彥月軒公大都捐貲力理堪崑故祀之云余畢致禮
山僧進茗啜余嗽飛泉讀殘碑覓異覽玄旁觀鐵樹一
本傳云六十年始花即諺稱丁卯云余怪之曰六十年
一花見者幾何山僧顧笑逍遙行數步為世尊祠莊潔

如前亦新構祠後為絕壁蒼翠蒙翳古字斷續雄眸讀
蓋宋洪熙中德進上人所為祝聖壽作也以故揭其寺
曰壽聖余讀且嘆曰嗟乎嗟乎浩劫遞遷懸崖如昨德
進已化嗣者伊誰山僧又笑惟時夕陽西照煙霧縈迴
迤北里許為清真嵒廣袤二丈中有三真像前構一堂
稍巍峻側有泉如線漸流應聲洪鐘叩之而雨密聲已
輒緩或曰上有李仙嵒碁磴具在此靈水也或曰此勾
漏洞所通之窟余記道錄適印證欲起而翱翔其境顧

崦嵫戒昏而余乃始問傳燈舍羅筏譚空色暢無生踵
深深息也夜半栩栩然夢也若登閬風見所謂異人導
引云大覺疎鍾神清興逸遂與山僧履危石躡徑蒼瞰
天一線逡巡梯竹行三里為白雲窩晴靄鬱蓊兩峰對
峙北轉而東蹊益峻左右代受踵二分垂在外為鵝頸
峰上有龍洞水潺潺也歲旱致禱者挹是往往神應之
盤曲迤東猥巖吟嘯古幹煩拏四望溟濛萬里一碧天
花亂落目幻心飛是為會仙嵒噫吁戲危乎真仙窟哉

余因禮稚川問長生撫掌高歌仰天嘆曰仙乎仙乎吾
將會汝汝會之乎頃之商飈搖颯白雲如蓋恍然昨夢
導引其人豈葛翁來耶其事甚怪於是尋丹竈掇神芝
得萬年松萬年者乾之不朽漬之復生也滿志護持還
寺與山僧談吐納之方茹鍊之術因言火傳不盡暗醺
有涯身世因緣總屬苦空無嗇爾神日月青山子請筆
記可乎余惟嶙峋削銳旖旎都房瀑布吞虛刁調怒竅
山有至文余何庸記托迹希夷談空物化探竒布采弔

詭拙思玉藻瓊敷余何敢記無已為繹松樹之旨夫萬
古常新山松似之歷世創見寺樹同之是乃所以記也
新廟貌現莊嚴壯山靈成功果山僧迥軼德進之上而
余觀勝事跳層崖瞻望先達諸公直旦暮遇之矣是舉
也經始於萬歷庚辰訖工於癸未費金若干皆僧募之
衆捐之而陸生坦居多審勢相形與有力焉坦蓋月軒
公子捐資姓氏類得鐫石僧名善慧別號本空上人

瑞泉記

張所望

粵之西瘴鄉也溪水多毒吏茲土者尤戒心於此余受命備兵鬱林既至首詢其水之宜人者州守李君華父進曰不腴下國越在遐鄙惟是南流之濱有紫泉焉可當潢潦之獻幸無虞余乃稍稍心慰已循故事周視城垣守向西指謂余其下即紫泉也然憑高一望了無所見余曰盍往觀乎守唯唯遂命駕出西郭不里許至江岸相去數十武得一盤石狀若蹲獸色清潤圓徑可二丈許石有二穴中瀆湧而上涓涓不絕流入於江所謂

南流江也挹而注之色瑩潔如玉氣溫而味甘風韻絕
勝考舊志宋以前無聞淳熙間郡守黃齡名之曰濯纓
泉至嘉定中水忽湧紫色因更今名自是每紫水出州
人士獲雋必多驗之徃徃不爽故又稱瑞泉云土人取
以釀酒既清且旨亦謂之紫酒今作子誤也余生平好
游所遇佳山水多矣如茲泉者殆未易匹又泉穴多出
山間蓋山氣融液而成而此獨得之乎原出於石罅尤
為可異若迺易色徵瑞豫啓人文此諸河清斯可作輔

則又異之異者是不可以不紀因書以遺李守俾刻之於石倘後世復有鴻漸試品之以為何如也

游水月巖記

楊于陞

州東南二十里許曰水月巖未及巖半里大石踞道旁狀若龍盤水經其腹出少折而東有山介其側天半懸一小菴茅蓬傾圯僅四壁立上橫古木漸就浥爛詢土人云舊羽士嘗棲息此中今不可復識矣數武及巖山勢嶽岑硯碗兀婁行鬐高幾插天卉木菁蔥陟其巔賓

主羅浮昆季勾漏蓋南條極隩區云水入洞口砰磅訇
礚穿洞而南折而東復折而北繞北以流更流而南以
匯於海今縣名北流舊縣名南流皆隸於州托始於此
耳洞口中峙石山以當門屏右有滴瀝若石芝然白哲
楚楚穹窿豁豁岫窳窳覆南北延長東西奇袤中結大
宇蓋外平內深象渾天儀石乳交流有笋中立上撐如
柱余目而戲之曰微此柱洞其誰支坐久縱觀有伏地
以處作布袋和尚者有半空憑虛類菩提薩者直立倒

挂如飛如潛如人如馬如金如鼓是不一相或青或黃或白或赤或碧或綠相不一色叩之而出金石聲即之而苔蘿葑蘚巧匠之所不能鑄丹青之所不能寫洞之庭堂也彌迤稍西深入可十餘丈轉幽轉邃底石稱是水亦委輸洞之退室也徑經小石橋而南上數級入一小穴狹隘僅可容身冥不見天左右告余曰前此來游者止於此不遽入穴以內神仙之居蛟龍之所窟穴非凡人所敢近余咤而異之曰吾以神仙吾儕友蛟龍吾

豢畜其何畏而不往同行者曰大夫體肥恐穴小未便
跼蹐耳余應之曰謂天蓋高不敢不跼謂地蓋厚不敢
不踏余之跼蹐也久矣其何虞而不往廼命隸人把火
導引余就地作俯伏狀稍下更轉而西三兩武穴漸高
頭漸起余仰視嘆曰此必玉皇上帝臨御之所同行者
曰何以知之余應之曰非至尊在上余何以方入而即
俯伏也迫視之奇幻萬端又一周天寶幢翩翩成行列
隊有若青衣童男女侍立者有若瓶花果核供奉者有

若執蓋御馬而給使令者有若褰帷設幔碧宮紺殿白
堊丹漆之煌煌者洞之深突奧窔處也又折而西左白
石如獅子大右一石壁空同玲瓏其下皆石田塍畔分
明土人曰此仙田也稍高埠有石牀土人曰此休牀也
田牀俱無恙神仙杳然豈部下神前知大夫來而避之
耶抑仙凡之隔不與我言兮是未可知也左右告余以
天晚循故道以出正日之方中匏樽相屬余徙倚長嘯
有是哉大冶鑪錘之巧乎道家稱三十六洞天羅浮其

第七羅浮鬱林皆古交趾地葛稚川求為勾漏令後居
羅浮北流有勾漏洞距此洞纔三十里地脈斷續起伏
如人身頭顱肚腹手足支幹連絡貫通環交廣諸山結
成朱明曜真天一塊世界則水月洞天即勾漏洞天勾
漏洞天即羅浮洞天此洞正三十六洞天之散布凝結
奇奇怪怪不可測識也如是夫土人復指某為栖霞菴
某為釣天洞某為天馬洞景致差勝土人懼來遊之妨
農壘石塞之因塞以求通可乎余應之曰渾沌鑿機智

生可使由之不可使知之導民者因之而已其又何求焉同遊者莞爾而笑同遊為誰州端鄭紹虞山人陳少華也併記之

遊虞山記

鄺露

虞山帝祠秦松夾道若駕蒼龍乘雲螭南巡之狀其後堯山蔽天而下其前灘江經之皇灣緯之其制度則外朝內寢帝儀肅於明堂二妃正於端幃儼然南面而蒞之其儀禮則主鬯冠衣劔佩三十有九助贊幘衣一十

有六蓮豆瑚簋彝鬲洗罇鼎盃爵卣幡鼓絃瑟七十有
七廟後有洞鐫曰韶音石質純青深十三丈有奇其傍
蹲龍走虺狀若笙匏埙篪者無算洞後見招隱山魚泛
鳥瀾若握鏡之望方壺也外有鉅石西臨皇灣上左折
為南薰亭舁山枕灘諸勝攬擷其碑晉有庾闡之叙後
魏有溫子升之碑唐有張曲江之文宋延清之詩觀文
之隸李陽冰之篆宋則朱紫陽之碑桂山文獻茲焉特
盛出門薰風徐來舞於松柏之下石竅土囊和若鈞天

不知身在何世也

陽塘記

璇桂皆山璇桂皆水也離江陽江彈丸西湖白竹躍城郭市日域姑未暇論即城中揭帝梓童華景西清色色入品惟陽塘最勝陽塘東西橫貫中束以橋東曰杉湖西曰蓮蕩征蠻幕府鎮守舊司南北相望演漾各數百畝臨水人家粉牆朱榭相錯如繡茂林缺處隱見旌旗西枕城闌陽水入焉余先一日憶吾家花田遊舸有詩

云芙蓉葉爛不還鄉五月玄巖尚怯霜夢入花田看越
女手擎丹荔倚斜陽及遊陽塘風開翠扇水泛紅衣杜
若芳洲不減花田珠海紅蕖白芷不減丹荔素馨紈綺
王孫不減三城狹少詞郎佳句不減水部風流金谷佳
人不減海邊素女至如玉山紫黛金削芙蓉倒蘸冰壺
天光上下則吾家之所無也昔人謂楚南山川造化以
慰夫賢而辱於此者余雖非其人而所慰倍多於人觀
其所慰而天地之情見矣


游桂林招隱山小記

自西湖至招隱山二里山光水碧石門劒立矍然若神
物持之西折北牖洞綺窓串玉下則品水潑墨巨魚金
鬣朱髻北臂有穴如門出門為金龜潭潭盡芟荷外為
蒙溪橫五里徑二百步今皆灌為田矣東南轉嶺石林
夾聲至朝陽洞洞口直下二十步有水旁浸潭側南望
玉乳如飛燕擁雪南陟飛梯四十級有雙碧玉盤二乳
滴下聲如清漏又九級有白玉盤自然出水可飲十人

予寫張衡四愁其上還自石盤東北上十二級得石堂
乳穗并垂蔓之錚錚哀玉自堂北出西入小峽得內洞
東有石室如畫頂上方井華蟲綺藻自洞南下仰矚東
崖小樓雙石人如舞閣妖姬寡楯窺客自樓閣斗下次
蛟渠渠跨石梁長三百步非列炬弗進南抵絕壁飛梯
九盤及水是為玄潭下有石閣綴以危檻景落潛國羣
龍詭吸自石閣還上絕壁四十步得小洞僂行三十步
左右鍾乳朗然映人有穴通嘉蓮洞從洞出六十步有

石室名白蝙蝠又北上得外洞壁下有石其面砥平有白石琴薦可撫清絃東有便房節枕桁櫨四樽曲几鬼工之追琢也北七步臨西石門至夕陽洞深九丈許崖北有道可以專車崖南有水可以鏡魚自南北崖下眺南潛北潛二洞有連理松連理橘偃蓋柏玲瓏鐵榦連卷怪石香臺梵剎皆從枝葉間出自西洞口去一矢得南華洞西有石可容數榻東有清泉又一矢得白雀洞洞口隘狹摩臍擦耳側身通人北上山頂盤曲五百步

碑兀竒聳靈石竒於東南松蘿萃於西北其水自嘉蓮
經白雀歷朝陽傍侵北牖出於南華而入於湖又一派
自蒙溪源北牖之北出於北山南滙南華而入於湖其
六洞小篆皆唐李渤所書然茲山雖竒著勝在水宋人
灌之為田乾道張徽猷作斗門閘之作復西湖記嘉靖
中復灌為田噫負郭有田而豪傑無奮庸矣



粵西文載卷二十一